

全
浙
詩
話

全浙詩話卷二十九

會稽陶元藻篁村輯

男

廷珍

編次

仁和朱文藻映濬

參訂

同邑宗聖垣芥颿

明

瞿佑

佑字宗吉錢唐人洪武中歷仁和臨安宜陽訓

導升周府右長史著存齋樂全集香臺百詠

歸田詩話

彥能嘗以唐三學士奕棋圖求題予爲賦

絕句三人當局各藏機思入幽元下子遲畢竟是誰高
一着風簷日影靜中移彥能歎賞敬夫以雪詩見示予
和其西字韻云夜靜有舟來剡曲時平無馬入淮西敬
夫亦加譽焉予時年甚少敬夫爲鄉前輩彥能亦倍年
以長二人慕有宿草久矣因念舊友爲之悵然 洪武
間杭州元夕張燈頗盛予因遊觀有句云三市華燈依
舊好一天明月爲誰圓惟郁魯珍和云春燈閒論誰家
好夜月初看此度圓句意甚新爲衆推許魯珍後爲官
陝西被累退居獨山村中不復入城寄詩云我已栽成
三徑菊君今著就幾編書然竟以題松石軒詩卷被累

死獄中其被逮也見予誦許仲晦詩村逕繞山松葉滑
柴門臨水稻花香牛羊晚食鋪平地鸛鶴晴飛磨遠天
日落遠波驚宿鴈風吹輕浪起眠鷗等句謂寫村居之
景曲盡其妙今不復見矣予因其言念郢州詩之妙而
亦哀魯珍之不幸也 盱江胡子昂能詩嗜飲字體逼
趙松雪因自號竹雪求予作竹雪齋詩久不及奉近隨
邊將守禦興和枉道來顧去後復以書來督始爲作長
歌一篇寄去子昂甚喜亦和韻答予詩曰盱江才子世
無匹作字哦詩俱第一酒酣落筆風雨生滿幅龍蛇飛
狹狹平生與竹同歲寒手種千竿復萬竿開窗倚檻忽

有得四圍總是青琅玕山空歲晚獨相對一夜幻成銀
色界靜聽春蠶食葉聲閒看瑞鳳穿花態瓊瑤玉佩下
朝端聯珠積翠紛成團曳履先生太寒乞煮茶學士眞
儒酸何似銜杯自竇主戲呼元穎相爾汝臨池一掃陣
雲開狂欲歌兮喜欲舞手斡造化天無功顛張醉素趨
下風一紙千金世珍惜不數前朝松雪翁子昂和韻云
春秋家學疇可匹道德文章追六一吁嗟白壁點蒼蠅
塵尾祛之猶狺狺一從遊宦閱暑寒桐江拋却老釣竿
劬書磨盡萬銚墨狂吟題編千琅玕山陰正與剡溪對
蘭亭曾把烏絲界霜猿抱樹恣盤拏雲鶴遊天隨變態

凝神運腕任筆端硯池飛雨暝作團筠陽太守有篆癖
山東僉憲無文酸袁安愛以菊爲主墨汁淋漓能貌汝
老夫撚斷幾莖髭笑看邊城六花舞麴生於我最有功
一醉四坐生春風箇中真趣知者寡此意寄謝存齋翁
仍題云兼柬唐太守晏僉憲袁教習時三人與予同寓
保安後一年興和太守子昂死馬悲夫 永樂間予閉
錦衣衛獄胡子昂亦以詩禍繼至同處囹圄中子昂每
誦東坡繫御史臺獄二詩索予和馬予在困吝中辭之
不獲勉爲用韻作二首時孫碧雲蘭古春二高士亦同
在圍室見之過相賞歎今子昂已矣追念舊處患難爲

之泣然詩云一落危途又幾春百憂交集未亡身不才
棄斥逢明主多難扶持望故人有字五千能講道無錢
十萬可通神忘懷且共團圍坐滿炷爐香說善因酸風
苦霧雨淒淒愁掩園扉坐榻低投老漸思依木佛受恩
未許拜金鷄艱難饋食憐無母辛苦迴文賴有妻何日
湖船載春酒一篙撐過斷橋西 汴梁相國寺暇日予
與黃體方過馬將謂有南方花木之勝香茗之供而鄙
陋殊甚僧皆毡帽皮靴髮長過寸言貌粗俗體方呼爲
惡僧口占云步入空門見惡僧紅毡被體髮鬅髻予續
之曰一言能得君王意安得當年老贊寧蓋宋初贊寧

爲寺主太祖至寺行香問曰朕見佛拜是不拜是對曰
現在佛不拜過去佛大合帝意遂爲定禮 楊廉夫晚
年居松江有凹妾竹枝柳枝桃花杏花皆能聲樂乘大
畫舫恣意所之豪門巨室爭相迎致時人有詩云竹枝
柳枝桃花吹彈歌舞撥琵琶可憐一解楊夫子變作
江南散樂家或過杭必與予叔祖宴飲傳桂堂留連數
日以香奩八題見示余依其體作八詩以呈稿附家集
中忘之久矣今尚記數聯花塵春跡云燕尾點波微有
暈鳳頭踏月悄無聲黛眉顰色曰恨從張敞臺邊起春
向梁鴻案上生金錢卜歡云織錦軒窗聞笑語採蘋洲

渚聽愁吁香頰啼痕云斑斑湘竹非因雨點點楊花不
是春廉夫加稱賞謂叔祖云此君家千里駒也因以鞋
杯命題予製沁園春以呈大喜卽命侍妓歌以行酒歡
飲而罷袖其稿以去 張文昌還珠吟君知妾有夫贈

妾雙明珠感君綢繆意繫在繡羅襦妾家高樓連苑起
良人執戟明光裏還君明珠雙淚垂何不相逢未嫁時
予少日嘗擬樂府百篇續還珠吟云妾身未嫁父母憐
妾身旣嫁室家全十載之前父母主十載之後夫爲天
平生未省窺門戶明珠何由到妾邊還君明珠恨君意
閉門自舛涕漣漣鄉先生楊復初見而題其後云義正

詞工使張籍見之亦當心服又爲序其編首而百篇皆
加評點過蒙與進先生元末鄉貢進士洪武間擢知荆
門州卒於官

詩家直說 羅隱曰世祖升遐夫子死原陵不及釣臺
高范仲淹曰世祖功臣三十六雲臺爭似釣臺高儲嗣
宗曰春風莫逐桃花去恐引漁人入洞來謝枋得曰花
飛莫遣隨流水怕有漁郎來問津袁郊曰后羿徧尋無
覓處不知天上却容奸瞿宗吉曰后羿空能殘九日不
知月裏却容私范謝瞿皆出祖龔瞿得點化之妙

靜志居詩話 宗吉幼爲廉夫所賞拾其唾餘演爲流

瓜劉士亨馬浩瀾輩爭效之譬諸畫士女者肌體凝肥
形神猥俗其稍有風骨者如射虎何年隨李廣聞鷄中
夜舞劉琨蹈海莫追天下士折腰難事里中兒庶與凌
彥种李宗表相近

熙朝盛事 郡人觀潮自八月十一日爲始至十八日
最盛蓋因宋時以是日教閱水軍故傾城往看至今猶
以十八日爲名非謂江潮特大於是日也是日郡守以
牲醴致祭於潮神而郡人士女雲集僦倩幕次羅綺寒
塗上下十餘里間地無寸隙伺潮上海門則泗兒數十
執綵旗樹畫傘踏浪翻濤騰躍百變以誇材能豪民富

客爭賞財物其時優人百戲擊毬關撲魚鼓彈詞聲音
鼎沸蓋人但藉看潮爲名往往隨意酣樂耳瞿宗吉看
潮詞云嘉會門邊翠柳垂海鮮橋上赤欄欹行人指點
山前石曾刻先朝御製詩出郭遊人不待招相逢都道
看江潮今年秋暑何曾減映日爭將畫扇搖一線初看
出海遲司封祠下立多時須臾金鼓連天震忙殺中流
踏浪兒墟頭酒美勸人嘗紫蟹初肥綠橘香店婦也知
非俗客奚奴背上有詩囊沙河塘上路岐賒扶醉歸來
日已斜怪底香風來不斷擔頭插得水犀花步入重門
小院偏金貌飛裊夜香烟家人笑問歸何晚已備中秋

賞月筵

許繼

繼字士修寧海人洪武中台州儒學訓導有觀

樂生集

靜志居詩話 士修自號觀樂生賦詩九章其言曰天地間物物可樂也况垂象成形之大者乎塵土憂勞亦人自爲耳靜以觀之取其寄於目而樂於心者爲觀樂九詠九者何青天也白雲也初日也霽月也丹霞也滄海也遠山也澄淵也古書也其夜坐詩云不意片楮間乃見古人心自道詩云聖言久彌宣有求卽可得皆守

道之言也

三台詩話

許士修繼詩清雅俊逸出乎天趣言暢旨

深高妙處有魏晉人風格大抵明初吾郡詩二許爲最
伯放學杜氣勢雄偉士修近陶意趣安恬同時雖名手
輩出終莫能及正學謂數友二十年交海內知名士甚
衆考其所存莫有類吾士修者然亦未嘗不心折伯放
也

夏寅

寅字正寅山陰人子燠灼

紹興府志

正寅雅好吟咏或評其詩云淡如陶令霜

中菊清似王維雪後蕉一時名士皆宗之子煥字光章嘗詠春花秋菊詩至二三百首旣而歎曰作詩貴關世教安事花草自是有作必借古爲喻託物以諷大有裨益於風教子灼字孔章著詠史詩多前人所未發邑大夫蕭鳴鳳贈以詩云近將一管春秋筆遠紹千篇雅頌音又云日月有光看舊案乾坤無際得新箴蓋確論云

李季衡

季衡名平以字行一云字公平又字希平海鹽人孟璿弟布衣有西溪集

儻李詩繫 李布衣季衡著有西溪集其追元和人十

臺懷古詩膾炙人口他如隴頭牛出春耕雨海上人歸
晚負鹽鵝鳩啼散村前雨蹇犢耕殘谷口雲皆集中佳
句也

陳大昇

大昇黃巖人

黃巖縣志 大昇善詩時周令旭鑑以猛治邑一日忽
召大昇家人震驚莫知其由已至則命題西湖清景圖
大昇爲題長句頃刻而就令大嘆服

祝宗善

宗善江山人由邑教諭擢蘇州知府

兩浙名賢錄 宗善博學能詩洪武間舉爲邑教諭秩滿之京館鷄鳴僧舍客有微服倚闌吟者韻未竟宗善揖續之客問其名而去翌日傳手詔召見擢知蘇州府始知微服倚闌者太祖也宗善守廉介以詩文擅名後坐誣籍其家惟圖籍數卷而已仍復其官

王 濟

濟字伯雨烏程人仕爲橫州判官

湖州府志 濟與劉南垣孫太初張元清結峴山社所居有長吟閣寶峴樓圖史彛鼎奪目充棟顧元慶詩話稱其人物高遠所著宮詞善託今詞歸古意王建難稱

獨步矣

傅藻

藻字伯長義烏人由本縣儒學召授翰林編修
拜監察御史官至河南廉訪使

義烏縣志 伯長受業王潛以文章知名爲御史時奉
勅按鳳陽獄道途往還成紀行詩若干卷率有關於風
教一日召對以詩進呈帝大悅作和章賜之

王紳

紳字仲縉義烏人

金華先民傳 紳諱仲子也諱死時紳年十三落筆爲

文不可禦未幾母兄相繼沒熒熒憂患中而餓然負奇志盡取經史百家言出入上下務擷其精奧乃己宋濂一見竒之曰王子充爲不死矣紳痛父遺骸未返首邱躬趨雲南求不獲乃卽死所設奠慟哭招魂而返述滇南慟哭記以見志徵授國子博士卒所著有繼志集三十卷其文豐蔚雅贍稱其家法詩冲淡有陶韋風子稔字叔豐亦以文詞名有青巖集

柴惟道

惟道字允中江山人

衢州府志 惟道縞服癯形皜然不滓獨好爲詩其詩

清潔飄灑置之唐人中未可辨刊落世事卓然高操天台友人王宗沐爲作玩梅亭稿序

王澤

澤字叔潤號青霞天台人僑居山陰洪武中官華亭縣丞有青霞集

明詩綜 叔潤詩音聲嘹亮亦是作家全寶泐公有送王叔潤詩云平涼來又去官滿復之官則叔潤任平涼之華亭非松江之華亭也徐子元云青霞天厨之珍自然適口

三台詩話

杜東原耕餘錄有弔張士誠詩天星夜落

水犀軍又見吳臺走鹿羣
睥睨金湯空自固
倉皇珠玉竟俱焚
將軍只合田橫死
國士曾無豫讓聞
風雨年年寒食節
麥盂誰上太妃墳
此蓋當時有感於士誠者
近閱堯山堂外紀
乃王澤作也
澤字叔潤號青霞
臨海人
僑居山陰江北里

王有德

有德字懋修
縉雲人
布衣

處州府志 懋修敦行
古道不求聞達
壽日泣然淚下
曰誰云七十古
稀期老萊斑衣
猶是兒晚慕堯
夫之學
庭訓深篤
考終絕筆
有懶向棋枰
搨得著
又從詩譜起

長思之句

樊潔

潔字叔廉縉雲人

處州府志 叔廉年二十二時父沒太學至丹陽哀慟
至狂疾丹陽令何公鏗救之贈以孝廉二字歸建思永
亭悲吟其中有月色中天夢裏愁驚寤恍若赴丹邱號
天陟岵空啼血羞向曹江湍水流等句

柘軒集

是畫詩序

高讓士謙爲予作枯木竹石并題其上

予遍索交遊得十四人終之以予詩凡十六首二畫共
三十二首披圖則存沒如見庶幾篤友道云張昱光弼

則廬陵人也王裕如問陳睦宗亮則山陰人也朱誼仲
誼則維揚人也章師孟季醇則嚴陵人也浦長源則勾
吳人也周昉元亮則新城人也張輿行中則崇德人也
王立本宗則金華人也王謙自牧楊明復初俞友仁文
輔王正道子中萬振文遠則皆錢唐人也洪武丁巳秋
八月初吉題詩云枯樹婆娑近竹叢欲將心事託春風
江南庾信今頭白不爲愁多賦未工抱書求題莫厭頻
好詩比竹更清新坐來不待風敲戶滿眼相看是故人

戴璿

璿字文璣號松澗黃巖人所著有喬雲樵唱集

石屏詩集附錄 松澗博覽羣籍尤精於醫所著有喬
雲樵唱集藏於家集中自述松澗詩云處世無能祇自
憐攜書投跡市東偏旋開草徑蒼松下更結茅齋碧澗
邊宿雨初收鳴雜佩和風微度響疎絃餘生果遂栖遲
願疏食簞瓢亦晏然

戴奎

奎字文祥號介軒黃巖人洪武中齊河縣主簿
有介軒集

靜志居詩話 風定小軒無落葉青蟲相對吐秋絲素
淮海句也文祥移入夜景可謂青出於藍秋夜有懷詩

欲憑詩句寄秋風吟到宵分密炬終月色如銀庭樹冷
一絲和露墜青蟲

余玠

玠山陰人

珊瑚網 東原先生贈月舟上人詩畫清絕一時山陰
余玠見之遂和詩云一棹清江近塵途更不由烟光分
遠渚秋色自中流偶作有爲偈非關無酒游歸來有別
意猶自未迴頭

陳庭學

庭學天台人

三台詩話 天台陳庭學給事儀曹屢從大將北征出
爲四川都府照磨雖在繁劇意度閒雅暇則退休一室
歌嘯自得扁其軒曰小蘭雪孫典籍蕢爲題云君方少
年富文采早入西清掌書牘天官宗伯司銓衡更佐邊
臣鎮巴蜀開府同專三品印退食初架數椽屋旣營楚
畹栽碧叢復對天花咏黃竹宋景濂學士言其在蜀險
要及古來戰攻駐守之迹詩人遊覽之地莫不徘徊登
眺而紀以詩誠奇士也

楊天顯

天顯字秉節天台儒士授燕府長史

三台詩話

楊秉節天顯詩才便捷頃刻萬言由天台

儒士舉授燕府長史會琉球使來貢方物太祖賜日本
畫扇命秉節題之卽奉詔成長篇云銀花尺楮蒸冰輪
來自東海扶桑濱明如半月行秋旻捲若積雪無纖塵
上有畫圖妙入神丹青黝聖俱精新健牛拖車負輪囷
猛士挾之氣溢津車中裳冕者何人衛以騶導儀宰臣
前後廣騎動成羣刀弓在手介在身氣雄海外願四隣
誠心慕中國自然遐福臻區區一隅之國尚如此何況
萬乘居北辰八埏以爲家四海無不賓窮蜚與奔育驂
騶及麒麟畫扇誰能製賦詩難具陳奉詔與書此歸時

謝君親使者立丹墀下觀其揮灑不假思索驚嘆爲青蓮復生

陳伯傑

伯傑字俊德天台人守彬州

三台詩話 引述詩句有一增損而工拙頓異者天台陳俊德伯傑自洪武末守彬州凡二十三年勞心撫字將乞休先夜夢賦詩云多年種得淵明菊留向窗前伴幽獨夢中詩本兩句楊東里作軒記乃併其語曰種淵明菊伴幽獨能詩之人卽夜半讕語亦有倫理何至漆栗筆密若此耶 天台志引萬姓統譜伯傑本姓仇其

實譜載姓求非仇也

方孝孺

孝孺字希直一字希古臨海人建文中文學博士靖難兵至首以身殉有遜志齋集

西湖遊覽志 希直之從學於太史宋景濂也相得甚歡嘗從景濂宿南屏山晨起對雪浩飲高歌意氣慷慨後數年景濂死而鄉人有王生者偶寫南屏對雪圖索詩於希直希直閱之感歎陳迹遂題詩云昔年歲暮京國還艤舟夜宿南屏山山風吹雪天欲壓夜半大雪埋江關清晨倚樓望吳越六合玉花飄未絕恍疑江水駕

山來萬頃銀濤湧城闕山僧好事喜客留置酒開筵樓
上頭玉堂仙人朱夫子紅顏白髮青貂裘坐談古今如
指掌共看雲收月華上寒輝素彩相摩蕩碧海瑤臺迭
蕭爽酒酣擊節心目開慷慨弔古思英才荒祠古柏岳
王墓廢湖殘柳蘇公臺一時佳會難再得仙人天上塵
世窄王子何年繪此圖正貌南屏舊遊迹吾知王也奇
崛人新詩妙筆俱絕倫偶然揮灑豈無意神授彷彿存
天真世間今古同飛電回首人豪都不見空有蘿山石
室書夜夜紅光射霄漢蓋其時景濂已謝病還山而希
直自海上來迂邂逅於南屏師生道義之情湖山增重

矣其曰蘿山石室乃景濂談書精舍也

按景濂集中有送門人方孝孺還鄉詩前半言其能文好學後幅勉以用世立身從虞廷九官說來又譬以周魯之實直以三代聖賢相期師之贊弟無以復加他日希直之祭景濂也言不負所傳求鑒於皇天后士弟之服師亦古今無兩乃二人文行並垂不朽洵屬浙中盛事

南濂詩話

昔人謂詩盛於唐壞於宋近亦有謂元詩

過宋詩者陋哉見也劉後村云宋詩豈惟不媿於唐蓋過之矣予觀歐陽梅蘇黃二陳至石湖放翁諸公其詩視唐未可便謂之過然真無媿色者也元詩稱大家者必曰虞揚范揭以四子而視宋特太山之卷石耳方正學詩云前宋文章配兩周盛時詩律亦無儔今人未識

崑崙派却笑黃河是濁流又云天歷諸公製作新力排
舊習祖唐人粗豪未脫風沙氣難詆熙豐作後塵非具
正法眼者烏能此 方正學先生集傳天下人人知愛
誦之但其中多雜以他人之詩如勉學二十四首乃陳
子平作漁樵一首乃楊孟載作又有牧羊圖一絕亦元
人詩

蒹葭堂雜鈔 天台方孝孺少時嘗過嚴陵釣臺有古
詩一章敬賢當遠色治國須齊家如何廢郭后寵此陰
麗華糟糠之妻尚如此貧賤之交安足倚羊裘老子早
見幾却向桐江釣烟水此不獨工於詩天下第一等議

論也

靜志居詩話 正學先生文昌明博大開闢自如雖有小韓之名實與大蘇相埒說者謂先生詩非所長然五言精熟選體當在潛溪華川之右其說詩絕句云舉世皆宗李杜詩不知李杜更宗誰能探風雅無窮意始是乾坤絕妙辭又云前宋文章配兩周盛時詩律亦無儔今人未識崑崙派却笑黃河是濁流又云大歷諸公著作新力排舊習祖唐人粗豪未脫風沙氣難詆熙豐作後塵其意蓋辨香東坡居士也

三台詩話

朱竹垞以正學詩林鄭爲文學我家林爲

公輔鄭爲居貞似有誤公輔侯城畏友集中答趙伯欽
書稱其氣高才敏於人鮮推許視人行行然有不滿之
色又詩云雄文不見林公輔病眼荒荒何處開其人才
氣如此當時且曰被召命正學安得以弟子遇之乎蓋
林名嘉猷鄭則公智字原貞並以同縣親從受業坐黨
死者也 論者頗怪正學以仲舒之才建晁錯之策及
觀集中勉學詩其間多言削奪諸王傷殘骨肉非天理
人心之正且曰安得申韓氏化爲古伊周可知當時特
坐齊黃輩耳陸世儀詩鑿亦力申辨 方氏家乘被難
時金陵魏司寇澤方謫爲寧海尉有衿士余學夔日行

乞於道歌以諷魏曰何日都俞今反目區區爲願效程
嬰魏知爲義人潛托九歲子德宗走雲間依俞詞部改
姓余萬歷間傳至忠奕者始歸宗按王世貞爲寧海葉
秀才題方方氏復姓記後云正學先生在圍城中以幼
子托上海余氏其後人爲南昌司訓葉君刺得其狀云
在圍城知不在寧海且似自托與魏余二公無涉明史
稿世宗時松江人自稱方氏後一時士大夫翕然信之
爲纂歸宗錄旣而方氏察其僞言於官遂已諸說不同
如此

方孝友

孝友孺燕同被難

三台詩話 正學絕命詞史具載之石龍集有其弟孝友臨刑詩云吾兄何必淚潸潸取義成仁在此間華表柱頭千載鶴旅蒐依舊到家山先生手足被刑情不自已墮淚理或有之後西楊修實錄乃誣云再三叩頭不已彭惠公哀江南詞序建文死義之臣云後來奸佞徒巧舌自粉飾叩頭乞餘生母乃非直筆意蓋有所指也

盧原質

原質臨海人方孝孺姑子及第第三人

三台詩話

盧原質侯城姑子也及第第三人侯城詩

全浙詩話

卷十九

七

賀曰奉天殿上榜初開共賀江南得秀才好是青蘿居士說近來文運屬天台今太學題名碑無公及卓敬名乃成祖令磨去鐵網珊瑚有公石鼓詩一篇極古雅純正惜缺字不全日下舊聞所載亦同

黃 墀 餘姚人

陳子方 餘姚人

康熙己亥紹興府志 黃墀陳子方與陳性善友其官爵不可考性善死建文難兩人同赴之賦詩而死墀曰爲臣直欲全忠義豈料翻成與叛同子方曰北狩緣藏青史筆南還猶是白頭公崇禎末祔食表忠祠

袁洪

洪字廷玉鄞人以相術拜太常寺丞有柳莊集
靜志居詩話 寺丞得相法於別古厓識文皇於潛邸
遂遷寺秩然家本土族其父彥章仕元爲翰林國史檢
閱世稱菊邨先生嘗作布衣歌云我家頗讀書初非田
舍翁蓋道其實也寺丞於九流百氏靡不涉究歌詩亦
能入格不失菊邨家數

鄭幹

幹字叔恭浦江人永樂初以薦授監察御史

靜志居詩話 叔恭宣撫廣東民以取珠爲苦至卽奏

全宋詩卷之九
卷之九
九
罷永樂十二年年已七十有二矣值長陵埽平沙漠因
進五言詩帝嘆曰可謂滿朝詩伯第一

鄭復言 雍言

復言鄞人雍言復言弟

寧波府志 復言永樂丙戌進士選庶吉士讀中祕書
鈎纂精微預修永樂大典應制賦白鹿稱旨改禮部主
事歷陞太僕少卿引年歸弟雍言舉進士改庶吉士授
中書舍人仁宗監國屢命賦詩頃刻立就尋命署禮部
尚寶司及六科上嘉曰不獨文詞典雅作字亦端楷嚴
密甚類其爲人陞河南按察使僉事宣宗御極留直文

華毀日備顧問終太常寺少卿

錢安

安字靜能後以字行鄞人初授臨安訓導尋遷
韓府紀善永樂初召至京師因以老辭賜勅還
里有畦東集

甬上耆舊詩叙傳 紀善詩健樸有蒼然之色其佳句
如發手廐驛曰寒輕初試酒風好不停橈朝天官習儀
曰火存千歲藥雲擁萬年松三塔堰曰野田低接渚春
嶂遠連空過佛壠曰花嶼雨晴椒實麗竹居風煖樂苗
肥遠眺曰巖樹有情憐我老溪雲無意逐人流贈陸柳

州曰當世人倫歸月旦故鄉父老問寒溫東方彥修曰
粗有田園須養犢更無筋力可乘驂人至今稱之

李進

進字孟昭嘉興人號西園居士永樂初聘爲府
學訓導有西園先生集

墨畚錢鎛 蹇驢衝雪岸烏紗夜醉西湖賣酒家十六
吳姬吹鳳管捲簾燒燭看梅花此李訓導孟昭西湖夜
宿之作也詩亦醜藉可愛

靜志居詩話 孟昭鐵松居士懷用和士林詩選取以
壓卷句如杏花村裏春旗酒楊柳堤邊畫鷁船三月東

風初去鴈一番新雨又飛花
菰蒲風外呼漁艇楊柳陰
中認酒樓均有晚唐人風致

王一寧

一寧仙居人永樂癸未進士官至禮部左侍郎
卒贈太子太保謚文通

分省人物考 一寧英敏過於常兒年十三能詩仁宗
在春宮聞之召試早過銀河詩立奏中永樂癸未會試
尋丁父憂家居十年會宣宗求文士甚切吏部以應召
見試表正萬邦論及詩賦皆見嘉賞

章樸

樸字原質寧海人永樂甲申進士授庶常以収

藏方正學遺文死

三台詩錄 原質臨刑詩面母終無日歸竟定有期空
令二三月鵲帶血痕啼庶常被逮時其弟宗簡字原佳
相隨號泣擊登聞鼓願以身代遂與兄同死和兄臨刑
詩云正學竟非杳重泉會可期痛彼慈烏冷甘此雁行
啼聞者莫不哀之

魏驥

驥字仲房蕭山人永樂乙酉舉人由松江訓導
官至南京吏部尚書致仕年九十八而卒諡文

靖有南齋前後集

池北偶談 蕭山魏文靖公詩傳者絕少壬戌冬偶見
黃子久畫沙磧圖一卷卷尾有文靖題詩云江邨望極
際春明匝地人家喚欲鷹芳草一川朝灩灩嬌鶯隨處
柳層層蒹葭偏水遇幽島苔徑穿雲接斷塍回首夕陽
天末墮老漁猶自未收罾秀麗可誦

康熙己亥紹興府志 魏驥景太初四乞骸骨始得歸
時年七十有三矣家居二十餘年成化七年年九十有
八上遣使存問賜以羊酒粟帛未及拜命而卒先是有
大星隕其隣王文政庭中疾旣革忽就枕口占云平生

不作欺心事一點靈光直上行儵然而逝其子完以遺命辭免營葬詔從之賜諡文靖

按文靖雖不以詩名然鐫行集中者計若干首而散列於郡縣志者猶歷歷可數漁洋僅見其一耳其秋興云秋風高露涼明月滿庭戶輾轉不能眠起從階前步美人天一方何時遂良晤相思怒中腸坐覺年華暮遊陳山云清溪南面是陳山列嶂舒屏紫翠間幾度捲簾成晚對白雲時共鶴飛還風致俊逸俱不減此詩宜爲錫鬯

南疑之所賞也

又按仲房會稱永樂丙戌會試副榜所謂會試副榜者猶今之明通中正榜也其實未成進士明制官非翰林進階者卒不諡文是以家莊敏恭惠二公雖直聲嘉績彪炳一代皆不獲以文爲諡仲房諡曰文靖可謂破格褒榮矣亦猶羅洪先張元忭以五品官得諡皆曠典也

魯穆

穆字希文天台人永樂丙戌進士累官至右僉
都御史

三台詩錄 希文風節凜然楊士奇贈詩有八閩監海
國六月凜霜威之句又云安得今之僉憲者皆希文哉
平日所著有葩經或問禮記日鈔竹素游思等集詳見
郡邑志

錢 深

深慈溪人

天啟慈溪縣志 茅維揚永樂乙未進士授監察御史
臺中奏疏及諸道讞獄當否皆出其裁擇歷官至四川

按察使所至有廉名歸出之日囊無羨金邑人錢深詩以美之曰山中此日賦歸來共說清風似寇萊四十二年簪獬豸曾無寸地起樓臺

于謙

謙字廷益錢唐人永樂辛丑進士官至兵部尚書加少保英宗復辟棄市成化中贈太傅諡肅愍後改諡忠肅有集

水東日記 于節庵以兵部侍郎巡撫河南遷大理寺少卿入京不持土物賄當路沐人嘗誦其詩曰手帕麝菇與線香本資民用反爲殃清風兩袖朝天去免得閭

閻話短長

雪濤詩評 于忠肅公謙平生居高位甘清苦不以詩名然間有題詠肝膽畢見其童年題石灰詩千錐萬斧出深山烈火坑中過一番粉骨碎身都不顧只留清白在人間及爲河南方伯入覲題詩云手帕蘑菇與線香本資民用反爲殃清風兩袖朝天去免被閭閻話短長讀其詩可想其人

古今詩史 于忠肅公高風大節不在詞華而其斷簡殘編得於煨燼之餘如謝客只容風入戶捲簾時放燕歸梁亦知厚祿慚司馬且守清風學太常岸幘恥爲寒

士語調羹不用腐儒酸醉來掃地卧花影閒處倚闌看
藥方渭水西風吹鶴髮嚴灘孤月照羊裘往往膾炙人
口

筠廊二筆 祥符周雪客在浚晉稗載二事其一正統
朝于忠肅謙巡按太原有憫農采桑婦二詩先文康於
天啟朝縣令陽曲手書刻縣治屏上至今猶存憫農云
無雨農怨嗟有雨農辛苦老夫出門荷犁鋤村婦看家
事縫補可憐小女年十餘赤脚蓬頭衣藍縷提筐朝去
暮始歸青菜挑來半黏土茆檐風急火難炊旋蒸山柴
帶根煮夜歸夫婦聊充饑食罷相看淚如雨將奈何有

口難論辛苦多嗟爾縣官當撫摩采桑婦云低樹采桑
易高樹采桑難日出采桑去日暮采桑還歸來喂葉上
蠶薄誰問花開與花落二眠纔起近三眠此際祇愁風
雨惡割鷄裂紙祀蠶神蠶若成時忘苦辛但願公家租
賦給一絲不望上儂身丁男幸免官府責脂粉何須事
顏色收蠶猶未是閒時起與兒夫勤稼穡

秋燈叢話 毘陵周蓉和先生未遇時祈夢於忠肅公
祠夢忠肅盛衣冠降階欵迎揖就坐莊容相對默然無
語有童子立戶側朗誦一片冰心在玉衡者三竊訝之
不敢問頃辭出忠肅送及階握手言曰余事在汝汝事

在余其謹識之覺後不解所謂及入都謁侍講董公默
菴公一見如素館於家先是董公夢忠肅投刺拜訪意
若有所屬未及詢而寤凌晨闔人報周至故異而優禮
之康熙己未開博學鴻詞科遂薦周於朝賦題乃璿
璣玉衡句也恍悟前夢文思沛然有若夙構遂申選授
職檢討分修明史適周分得于忠肅傳同官有以易儲
事議之者公力辨其誣論始定

聖垣按徐后山柳崖外編云某公浙人所夢於于忠
肅公祠夢神與對話有字軸書唐詩云寒雨連江夜
入吳平明送客楚山孤洛陽親友如相問一片冰心
在玉衡公曰結語是玉壺何書玉衡神曰玉衡妙玉
壺便不妙矣公醒而不解後舉鴻博撫軍以公名入
薦續賦題爲璿璣玉衡賦授檢討所謂玉衡妙也官

數十年得顯秩予告而歸謝 思畢 賜圖章一方
出朝視之其文爲一片冰心在玉壺尋思舊夢忽然
驚悸歸第而卒嘻此所謂玉壺不妙也神其善作文
字哉或云卽彭先生孫適與叢話稱蓉和事實不同
卽夢詩時問
答亦有異

靜志居詩話 少保詩特多秀句如風來踈牖銀燈暗

月轉高城玉漏遲紫塞北連天末去黃河西繞郡城流
野花偏向愁中發春草多從夢裏生千里逢人俱是客
十年持節未還家鳥飛不過巖頭石人渴難尋澗底泉
風約閒雲難作雨渠分流水不成河坑頭炙炭燒黃鼠
馬上彎弓射白狼天外青山圍故國雨中黃葉下空潭
皆意態自然不煩雕琢其論詩曰詩豈易言哉發於心

形於歌詠盡乎人情物變非深於理而適於則未易工也觀其持論造詣深矣

武林耆舊集

于謙少英異過目成誦文如雲行水漏

詩頃刻千言奕奕俊爽田叔禾西湖志餘摘其七言今體如香蒸雕盤籠睡鴨燈輝青瑣散棲鴉紫塞北連天末去黃河西繞郡城流風穿踈牖銀燈暗月轉高城玉漏遲天外冥鴻何縹緲雪中孤鶴太淒清醉來掃地臥花影閒處倚窗看藥方渭水西風吹鶴髮巖灘孤月照羊裘野花偏向愁中發池草多從夢裏生皆佳句也夏日憶西湖詩云漫金門外柳如烟西子湖頭水拍天玉

晚羅裙雙盪漿鴛鴦飛近採蓮船

杭州府志

于肅愍公高風大節不在詞華而其斷簡

殘編得於煨燼之餘往往膾炙人口如剩喜門庭無賀
客絕勝厨傳有懸魚謝客只容風入戶捲簾時放燕歸
梁亦知厚祿慙司馬且守清齋學太常蕭澁行囊君莫
笑獨留長劍倚青天金鞍玉勒尋芳去肯住吾廬別有
春卽此可以知其孤介絕俗之操如香裊冰盤籠睡鴨
燈輝青瑣散棲鴉風穿踈牖銀燈暗月轉高城玉漏遲
岸憤恥爲寒士語調羹不用腐儒酸卽此可知其經畧
閎緯之才如天外冥鴻何縹緲雪中孤鶴太清癯醉來

掃地卧花影閒處倚窗看藥方渭水西風吹鶴髮嚴灘
孤月照羊裘卽此可以知其閒雅恬淡之思其他忠直
之氣獎與古今如詠蘇武則曰富貴儻來君莫問丹心
報國是男兒送人致仕則曰解組還鄉未白頭身安意
適更何求題十八學士圖則曰都將治世安民策散作
裁冰翦雪詞喜高僉憲病起則曰一團清氣難隨俗百
甕黃齏作養廉此皆直寫胸襟不當以風雲月露擬之
也

柳亭詩話 王司馬一鶚常夢于廷益聞其誦詩二句
曰空山清淚憑誰訴萬里忠魂獨自歸後當軸適浙撫

傅孟春以改謚疏請王乃定爲忠肅

文藻按珊瑚網法書題跋卷中載于忠肅落花吟云
昨日花開樹梢紅今日花落樹頭空花開花落尋常
事未必皆因一夜風人生行樂須少年老去看花亦
可憐典衣沽酒花前飲醉掃落花鋪地眠風吹花落
依芳草翠點胭脂顏色好韶光有限蝶空忙歲月無
情人自老眼看春盡爲花愁可惜朱顏變白頭莫遣
花飛江上去殘紅易逐水東流忠肅墨迹世不多
多見此詩爲注于水所藏今不知歸於何所矣

全浙詩話卷二十九終

全浙詩話卷三十

會稽陶元藻篁村輯

男

廷珍

編次

仁和朱文藻映濬

參訂

同邑宗聖垣芥颿

明

張楷

楷字式之慈溪人永樂甲辰進士歷官都察院
右僉都御史有和唐集

沈德符紀述

正統十四年福建勦賊都御史張楷作

除夕詩云靜夜深山動鼓聲生民何苦際斯時又云亂離何處覓屠蘇濁酒三杯也勝無又云庭院不須燒爆竹四山烽火照人紅爲給事中王詔所劾罷云宣德中楷先爲御史作詩以獻宣宗上意其求進欲罪之賴學士陳循力救而免至是終以詩敗

靜志居詩話 中丞和唐不獨律詩踵韻而已至歌行古風併上句亦和之同時餘姚陳贄維城亦然登黃鶴者必賡崔顥之章宴滕王者必仿子安之體人雖至愚不愚於此矣其在閩提督軍務除夕不須燒爆竹四山烽火照人紅爲言者所劾而罷此殆非和韻詩宜其中

禍後舍和韻不復作也

陳嵩

嵩字伯高寧海人年十五邑令辟爲胥吏不從
求爲邑庠生永樂中以太學生特詔充纂修所
著有春秋集義春秋名例

石倉詩選 陳伯高年十五邑令辟爲胥吏不從求爲
邑庠生令考經義三篇又俾賦詩有平生縱有長楊賦
也待吹噓送上天之句令加嘆賞永樂中以太學生特
詔充纂修

朱原益

原益字友學號桂花主人蕭山人

菊坡詩話 友學初夏感興云桑柘已空蠶未熟蒹葭
雖破燕還歸語頗雋雅

周 陞

陞字孟褒慈谿人

慈溪縣志 孟褒居市廛一室如舟所儲書史之外無
他物因號書舫齋爲詩歌音調高古不類今人每遇酒
酣擊節歌陶淵明詩四顧慷慨旁若無人

蔡 庸

庸字惟中紹興人

明詩集傳 惟中家貧教授與唐之漳錙積毛鉉並以
詩名時稱唐錙毛蔡

李 勗

勗字文勉山陰人

明詩集傳 勗自少好與文士遊鄉先生錙積王誼鄭
嘉謂曰爾欲與我輩游須讀書乃可感悟力學遂成名
儒時人稱錙王鄭李詩宗晚唐好學李義山

朱 純

純字克粹山陰人

明詩集傳 純淳雅有儒行與羅頤高輩結鑑湖社好

遊佳山水所至多題咏有陶鈞驢背自怡等稟

李匡

匡字存翼號肅齋太平人舊隸黃巖宣德丁未
進士累官至僉都御史

三台詩錄 肅齋巡江右時楊少保士奇子稷暴橫里
中微服往訪夜宿民家題壁上畫鷹天遣孤鷹下海西
冰肌玉爪未沾泥朝游已破羣孤膽夜宿還驚百鳥啼
云云擲筆曰是詩所以志也翌日遂舉按其不法事抵
之罪人大快之

王誼 王懌

誼字內敬山陰人宣德初待詔翰林預修國史
懌字內悅誼之弟正統初官溧水知縣

明詩綜 內敬兄弟皆能詩師太白一時之希聲也按
內敬春思云山映簾櫳水映窗浣紗人在苧蘿江年年
三月梨花雨門掩東風燕子雙風致殊佳

曹侃

侃字仲雍號竹齋烏程人

靜忘居詩話 仲雍詩集罕傳其詩有摹張來儀青弁
山圖贈鳳林巖十七蓋永宣間善山水竹石者也北宋
有曹孝子清嘗代父子聞之鄭芷畦云重辟於金陵漏

白沫尸泝流還家至今專祠類宮其子孫散居苕東之
西陽村族最蕃多務農桑罕通文墨湖海耆英集云仲
雍苕東人豈其苗裔耶同時有曹謙字鳴吉亦能詩

姚 黼

黼字廷章號松雲居士嘉興人有閒居集子綬

字公綬

松雲姚處志銘

錢博撰

處士諱黼字廷章曾大父康

六大父繼芳父驥處士博涉書史工草書精地理風鑑
尤善五七言詩得唐人旨趣有閒居集藏於家嘗於所
居之傍環植以松朝夕見雲氣往來輒忻忻若有所得

遂顏之曰松雲因以自號薦紳大夫士多爲詩文以紀
詠之尋託家政於綬築室數楹中列古鼎彝器金石遺
文法書名畫優游自樂他無所慕尚人皆以可閒先生
稱之亦足以見處士之雅致也

可閒先生逸稿 謬詩一首贅奉景伊文學以寓別來
之情詩云憶昨逢君四月初笑談懷抱最相符朝乘白
下看花騎暮醉長安賣酒壚別去江山頻悵望歸來松
菊未荒蕪登臨日候南飛雁肯寄平安一紙無元孫楷
云右詩我高祖與羅文忠先生柬中所系兼寄乃子景
伊公者

陳員韜

員韜字從興號勿齋臨安人宣德庚戌進士仕
終廣東右布政

三台詩錄 勿齋題抱琴圖云俗耳無知音古調不下
指攜此三尺桐松林任行止彈者不在聲聽者那有耳
灑然心兩忘高山與流水與林達本贈琴僧詩上人所
彈不在指我亦非由耳聽之同一超悟

陳顥

顥字漢昭嘉興人宣正間布衣有竹榻集

蓉塘詩話 嘉興陳漢昭顥能詩嘗題枇杷山鳥圖云

盧橘垂黃雨滿枝山禽抱啄已多時那知歲宴空林裏
竹葉蕭疎鳳亦饑此詩怨刺之意見於不言之表較之
孟浩然不才明主棄及薛令之苜蓿長闌干之句辭雖
隱而意愈露矣

黃南山

南山

閒中今古錄 宣德中先祖司訓南昌爲崔太守彥俊
題子昂胡馬圖曰塞馬肥時苜蓿枯雞官早已着貂狐
可憐松雪當年筆不識檀溪寫的盧胡祭酒謂含蓄褒
貶每誦之不輟 宣德間大父南山先生與慈溪王公

來俱以教職用薦入憲臺王巡按北直隸時於少保謙
任兵部侍郎欲舉王自代附書問消息大父復詩云出
處雖同調睽離各一方只因交窳厚常是念難忘賈誼
曾陳策曹參解促裝明年二三月延佇看鄴翔西陽先
生甚竒此詩王在職幾五年陞山西參政大父未滿六
年受勅任廣西督學僉事嘗奏保明經章致和等六人
堪任教職不報作詩云意氣日相信交遊四十年自甘
楊炯後誰意祖生先散地宜藏拙明時共蔽賢殷勤一
封疏消息竟茫然自宜出處窮通有命在焉爾

莫藏

藏字用竹海鹽人宣正間布衣有佩觿稿詠史
詩素軒集

橋李詩繫 素軒工詩文及真草篆隸八分諸體及鐫
古印章繪花木禽蟲水仙皆可愛邁疾占一詩三逕菊
松秋寂寂一庭風雨夜沈沈之句吟已卽逝著有佩觿
稿詠史詩素軒集皆失傳唯英華載秋日一詩又有送
鄭東谷之廣東詩云津頭貰酒桐花落馬首看山荔子
垂句尤警

謝績

績字世懋太平人有王城山人稿

太平縣志 山人之詩始規倣盛唐極婉轉流麗之妙
晚獨愛杜少陵則盡變其故格益爲清激悲壯顧其叙
事引典雖往復開合未嘗不出於正可以知其爲人矣
應 瓚

瓚號琴窗仙居人有琴窗集句

仙居縣志 瓚王一寧外孫幼攜之遊長安一寧應制
賦神京八仙上稱善瓚次其韻語尤奇麗一寧奏呈其
詩上大奇之曰斯真王學士甥乎命送中書肄業長遂
放詩酒不營仕進

蘇 平 蘇 正

平字秉衡海寧人舉賢良方正不就有雪溪漁唱

正字秉直平弟有雲壑集平正俱在景泰十才子之列

兩浙名賢錄 蘇平字秉衡弟正字秉直海昌人遨遊名士間時稱吳下十才子而平正兄弟與焉張楷寄詩云浙詩門徑未荒蕪獨賴芟除有二蘇其推重如此

靜志居詩話 鄭谷鷓鴣崔珣鴛鴦謝逸蝴蝶袁凱白燕皆以一詩目之終身秉衡以繡鞋得名風斯下矣卽其南陌踏青春有跡西廂立月夜無聲二語乃本於瞿

宗吉少時香奩之作所云燕尾點波微有暈鳳頭踏月
悄無聲也以吞剝而得虛譽忸怩已甚而秉衡妄爲大
言謂宋一代今體詩僅王禹玉元夕一律彷彿唐人高
青邱詩二千首近體止吳女誦經一首可取爾當日鄒
御史克明作三夸詩以秉衡爲首

張 翺

翺字羽皋仁和人

杭州府志 羽皋推步天文占望雲氣若有神授宣德
間浙人潘中丞將往南粵視師知翺習占候與偕行一
日坐帳中仰視片雲隱起謂潘曰事濟矣烈風南來乃

賊兆也已而果驗潘欲疏薦之竟逃去嘗以詩自述曰
有意欲嘗千里酒無心去傍五侯烟蓋其志也

袁 嵩

嵩號知止天台人著有知止集

三台詩錄 知止博洽人呼爲袁書厨年九十卒夏都
憲墳挽詩有一瓢已絕千秋筆雙屐長閒百藥欄之句

張一韶

一韶字尚成浦陽人諸生有病餘集詒燕堂集
浦陽人物補遺 一韶酷嗜書自禮樂刑賦旁及方輿
氏族星歷醫卜無不精究因慨然以著作自負攻古文

詞縱遊三輔名都岱宗闕里匡廬九疑洞庭彭蠡嶺外
盡交諸名士自是文益雄邁尤長於詩歌作詠史二百
篇援引駁據率自成一家言又著歷代詩章辨體樂府
考題晚善病然不廢吟咏

全大震

大震字二何甯東人

風雅閒談 人謂其樂府七律詞甚橫絕可喜余觀其
烘春延雜卉聚海饌羣腥之句亦十分爭新者

任瑄

瑄字士貞號師古蕭山人

菊坡詩話 師古字建州曾賦詩云儒冠脫却換兜鍪
十載羈危古建州塞北山川非錦繡軍中身世卽蜉蝣
行隨瘦影偏驚晚病怯西風怕到秋最苦有家歸未得
白頭慈母倚閭愁最真摯入情

薛敬

敬字原禮甬東人洪武初舉茂才授龍泉司稅
風雅閒談 人情莫不喜晴厭雨於元日尤甚甬東薛
茂才原禮晴色人都喜貧家客不來此其元日詩也寫
透人情之語李鄴嗣謂其淡樸之中更饒高韻已可概
見

張傑

傑字子興號平洲生仁和人

吳越所見書畫錄 明陸明本贈沈石田墨梅長卷明
本名復筆墨與王元章無異自號梅莊吳江人此卷千
枝萬幹花姿百變諸名人題於本身花幹之隙余每對
此卷如往鄧尉香雪中長洲沈周題云策策西風羣
褐塵雨逢長至好懷春蠟成短屐充遊子弔到名山爲
古人嚙齒詩兼梅蕊馥滯脣酒帶米芽新江湖滿地何
通塞野水扁舟在在津仁和平洲生張傑和云遊遍江
湖鬢欲塵行囊取得灞陵春一挑溪草燒丹藥雨屐山

苔弔古人中酒窗前宵卧穩惜花闌上曉吟新年年客
裏過長至不在權門與要津又跋云吾友張秋江先生
汗漫於江湖者舊矣宏治癸亥弔丹溪朱先生墓於義
烏明年甲子之東陽遊朱晦菴先生石洞書院乙丑之
長洲訪石田沈先生於其家皆長至日也秋江因感時
過易邁而萍踪無定喜得挹先賢之風於前古而荷高
士之遇於今日乃賦一律詩識意石田復爲次韻明日
適吳江陸梅莊至作梅花卷以贈石田遂錄所次詩於
卷之隙方用紀會晤而搢紳文墨之士咸續次之余辱
秋江交之且厚亦以效顰云正德改元臘月朔

呂原

原字逢源秀水人正統辛酉解元壬戌賜進士
第二除翰林編修仕至學士贈禮部右侍郎諡
文懿有介庵集

靜志居詩話 文懿不以詩名所爲古風引伸曲諭不
求工而自然精切此有德者之言也

沈 琿 沈 琮

琿字公貴平湖人正統甲子解元景泰辛未進
士山東道御史與兄琮公禮齊名號雙璧有橋
門漫稿栢臺新稿

靜志居詩話 公貴少與兄公禮齊名公禮詩有石窗
漫稿予少日曾見之記有擺榼香生秋雨後梧楸聲斷
夕陽前雨餘竹外僧歸寺日出松巔鶴下巢山花帶雨
落成片野鳥見人飛作羣之句今其集不復覩矣錄公
貴詩附識於此

商輅

輅字宏敬淳安人正統乙丑進士第一官至謹
身殿大學士贈太傅諡文毅

明詩綜 李德恢云太傅詩寫性情雍容雅淡有陶韋
風

吳越所見書畫錄 夏仲昭西垣春雨圖立軸淳安商
輅題詩云誰種西垣竹數行林間春意類瀟湘蛟龍翻
蟄蒼苔破翡翠拂簾春晝長老去貞姿渾似玉生來高
節慣凌霜疎枝帶雨添新綠虛籟生風散晚涼自許松
梅同雅操不隨桃李競時芳客臺對此多佳趣好把平
安寄遠將

周鼎

鼎字伯器嘉善人正統中官沐陽典史有桐郵
疑舫齋土苴集

珊瑚網

杜用嘉月舟圖嘉禾周伯器題詩云新住法

雲院阿師名月舟去來原不繫身世總成浮印徹千江
水觀空萬頃秋相逢問有漏資斧待誰修行舟江上月
觀我鏡中天結翳初弦後微波欲定前倦游收釣具吟
穩得詩禪曾到珠涇否三生舊有緣此夜閒乘月長風
漫引舟有僧如惠遠何樹是閻浮飛鏡三千界推篷五
月秋扣舷能見許予亦事清修

靜志居詩話 桐村開濟之畧戎慕宣勞顧一尉白頭
又遭薏苡之謗哀哉斯人實命不淑同時杜州牧庠貽
詩云功名已覺邯鄲夢衰老猶耕谷口田汪縣令貴詩
云白首九旬還向學黃梁一夢總成虛呂太常詩云斯

文藉藉歸輿論何物區區戀抱關沈處士周詩云山縣
軍書前吏跡墓堂文字老生涯吳江史處士鑑詩云行
誼故絕人文章後名世碑版照南州煌煌自無替集中
詩題有未死作云在塗嗟未歸行橐日已貧正如風中
絮未肯沒車塵嘲鴈云何地不虞網此身非故鄉誦之
使人心惻詩不見佳第恥拾人遺唾亦有志之士明古
實師事之

齊汪

汪字源澄號靜菴天台人正統丙辰進士仕車

駕司郎中

三台詩錄 靜菴扈駕至土木竟死其難楊御史善以
詩弔云扈從旌旗出錦州知君志與國同憂義明主辱
身先死厲鬼猶思斬寇仇今祀經賢祠

陳敬宗

敬宗甬東人官國子監祭酒

寧波府志 王鼎正統中以監察御史巡按山西有知
縣郭某貪而善賂鼎瀕行當道交口舉郭心異馬行部
至縣郭倍道遠迎承奉周至僉疑之摘發其奸一歲中
凡罷貪汚吏六十人再按雲南陞江西按察僉事同知
祭酒陳敬宗於人少許可贈詩有無瑕美玉千金價徹

底寒潭萬丈清之句其沒也學者私諡清節先生

夢華

華字子善錢塘人官安南參軍

留青日札 夢華字子善錢塘人魁梧倜儻燕頤虬髯
其詩蕭豁雋朗有翮爾樓稿如西湖曲湖水年年綠春
花度度新六橋歌舞地幾易管絃人年二十六爲安南
參軍有思親詩爲憐萱草庭前冷不變梅花嶺上春卽
挂冠歸其人品可知

沈宣

宣字明德仁和人由歲貢官安慶府學訓導

蓉塘詩話 沈明德先生宣號兩山仁和人天資穎敏
文詞瞻富早遊庠序與張海觀天錫齊名張鄉舉終教
諭沈卒不偶嘗有詩咏蟹云郭索橫行逸氣豪秋來興
味滿江皋玉釭十斛醪醪酒不待先生賦老饕豪俊可
愛

劉泰

泰字士亨錢塘人有菊莊晚香二集

西湖遊覽志餘 劉士亨次聶大年遊淨慈寺詩步聯
苔磴翠層層方外幽尋我最能虎熟不驚團社客鷗閒
常送過湖僧支那踏遍無雙寺臨濟傳來有一燈話久

頓忘饑渴想詩懷清似玉壺冰書此詩於壁間按察使
泰和曾蒙簡見之笑謂察察曰如此閒情我輩所不及
也

儼齊詩話 錢塘劉士亨泰號菊莊景泰天順間隱居
不仕極工小詩題豐樂樓云層層高處宴王孫湖上青
山落酒尊三百年來如一夢月明還照湧金門春日湖
上云浴鵲灣頭蕩槳過雨聲昨夜漲潮波落梅天氣寒
偏峭未許春衣試薜蘿湖上暮歸云小牒隴醉踏殘花
桑綠陰中一徑斜日暮歸來問童子春衣當酒在誰家
元人詩格中可匹揭曼碩薩天錫有唐賢風味也

攜李詩繫 劉御史泰天順初極論石亨擅權下獄幾不免臨卒作詩云清白肯爲兒女計踈狂曾切國家憂擲筆而逝年三十有八

施敬

敬字孟莊錢唐人謫居滇

靜志居詩話 孟莊詩頗清越句如斜日黃留漁浦樹隔江青度海門山鷓鴣蹋翻黃竹葉翡翠啄破蒼苔花天吳拔斷蛟龍尾月露洗出珊瑚枝夕陽靄靄衆山暝秋水迢迢雙鷺明芡苒綠深江草路枇杷黃盡客窗枝均有風致若歸燕一首疑是感革除而作

劉績

績字孟熙山陰人隱居不仕人稱西江先生有

嵩陽集

靜志居詩話 殘雪未消雙鳳闕新春先入五侯家晚

唐張蠙句也孟熙易殘以霽易新春以春風攘爲已作

遂以得名人或少之然竹影橫斜水清淺桂香浮動月

黃昏非江爲詩乎林君復易踈暗二字竟成千古名句

所云一字之師與活剝生吞者有別也張作全詩不稱

不若劉之首尾相當其自題詩本云幼小工刺繡極知

針線難祇緣花樣古不耐俗人看是時人爭學溫李宜

其以拔俗爲嫌也

按孟軻送王內敬重成遠海云曙色連關樹秋聲起塞鴻結客行云羞爲狗盜伍不傍子孟嘗門氣格俱佳顧元言謂其屬興豪華才思雄健良非虛語

王松

松一名本號慎齋黃巖人以子啟貴贈右副都

御史

三台詩錄 王雲母守志撫孤里豪金五利其貲聚羣惡少謀篡娶之有二虎踞其門駭散去松有題王貞婦冊詩云當門猛虎人皆見對鏡孤鸞已獨悲乃當時事實也

金湜

湜字本清，鄞人。以鄉舉累官至太僕寺丞，督山

東河南馬政

甬上耆舊詩叙傳。太僕寺丞金先生湜居里門蕭然，四壁風格竅高。每畫竹輒有一詩，楊文愨公每稱太僕先生重其筆墨，謂在子瞻與可之間。晚年過湖南延慶寺，爲老僧畫竹一紙，懸諸寺壁。後時過之，輒加題一絕，積至十首。及垂老復至寺中，見尚有素處一方，卽欣然命筆曰：草堂南北路高低，林下相逢日又西。只爲詩多不礙竹，幾番題過又重題。以後遂不復過。今此畫爲好。

事家所得尚在人間先輩人風致良足愛重也

李迪 桂廷璋

迪字叔迪，鄞人，自號長清處士。

廷璋，慈谿人。

珂雪齋外集 徐秀夫畫蒲桃極有虬龍矯矯之勢詩云：月上松棚露氣清，翠濤挾雨作秋聲。驪珠散亂無人拾，滿地霜花鬪月明。姚江李迪筆也。露洗涼州馬乳香，誰知沆瀣滄瑤漿。昭陽殿下思晞髮，分賜君王不敢嘗。慈溪桂廷璋筆也。

甬上耆舊詩叙傳 先長清處士工於詩，吾家旣世授

經所從交遊復俱里中宿老故所傳哭長清處士詩每
得名其見此選者已數家以外佳句如金騰曰鳥几陳
千載龐眉守六經齊政曰靜氣衣巾古開心魚鳥熙倪
光曰柴車已斷山庭路劍草空深墓碣烟滅砧口雲偃
雙扉蒼竹暹月寒一棹白鷗汀金溥曰葉落桐秋風寂
寂花踈菊岸雨冥冥范麟曰興來蔽竹常開甕老去看
山不下樓俱足傳也

按長清爲杲堂五世其爲鄆人無疑珂雪齋指爲姚
江人誤矣桂氏爲甬東巨族杲堂與胡道南參訂耆
舊詩搜剔殆盡獨不及廷
璋隻字亦屬滄海遺珠

陳昌

昌字穎昌平湖人有菊莊集

襦李詩繫 我邵白清江巽隱後風雅衰落二陳一李
之餘無聞焉至正統天順間而始盛一時如陳菊莊外
嘉興有姚穀庵海鹽有張方洲嘉善有周同村皆卓然
大家也菊莊我里先哲才思藻麗長於七言沈石窗兄
弟目爲畏友著有菊莊集惜其不傳僅從襦里英華錄
若干首覘其一斑已足俯視流輩

楊守陳

守陳字繼新勤人鄉舉第一景泰辛未進士入
翰林五品歷侍講洗馬遷學士終吏部右侍郎

兼詹事府丞贈禮部尚書諡文懿有晉庵桂芳
鏡川東觀金坡銓部諸集

靜志居詩話 文懿難經伉伉不屑拾淳熙諸儒遺唾
而詩格深穩在唐宋之間其史館成懷詩云在昔左右
史言動悉分書由漢至國初在官注起居不知自何歲
史職曠成虛有故始闕館編纂亦紛如新人叙陳迹寧
免濶且踈又云崔杼弑其主直筆遭刑誅二弟相繼死
南史又特書古人守一職往往思捐軀可憐今世士利
害論錙銖蓋公留心史學草疏言國史有三大闕事未
舉惜乎未及上也晚語徐少詹云平昔才無半斗而勤

作文飲僅數合而喜與客讌行不能里許而好遊蓋雅人之習尚然矣

楊守陟

守陟字維立守陳弟學者稱爲碧川先生中進士廷試一甲第二名授國史編修累官吏部尚書

兩湖塵談 宏治初鏡川楊公守陳以少詹事視院篆碧川楊公守陟以侍讀掌南京翰林縉紳相語以爲兄弟對掌南北詞林近世所未有碧川有詩云天風吹斷鴈鴻行霄漢平分兩玉堂小弟初懷南署印大兄又縮

全宋詩 卷三
北門章纍纍不是權家客奕奕同依帝德光仰止前修
稱二趙絲綸對掌並流芳

伍方

方字公矩嘉興人景泰甲戌進士官武岡州牧
謫戍柳州有柳庵集

靜志居詩話 公矩與張靖之邱仲深同年成進士三
人莫逆時有倡酬靖之詩云邱仲深伍公矩元是長安
看花侶又云江東雲渭北樹仲深不來公矩去望斷斜
陽舊遊處仲深亦有送公矩之柳州詩云平生故人伍
公矩少年學文今學武興來拔劍爲我舞顧儂豈是噲

等伍末云兵山高兮粵水長南歸若見張給事引杯燒
燭歌我送行章可謂篤同譜之義矣柳庵集予少日於
金明僧舍見之凡四冊曾覽一過今購之不復可得僅
從攜李英華集錄其一首雖不見好存其人可也

張寧

寧字靖之海鹽人景泰甲戌進士授禮科給事
中以直諫爲人所忌出知汀州未幾乞歸家居
三十年以書畫自娛有方洲集

靜志居詩話 黃門賦才捷敏不費沈思兩使朝鮮水
館星郵留題殆徧陪臣樸元亨以刑曹判司爲館伴詩

篇酬和殊不相下及借登太平館樓黃門成七言長律
六十韻元亨誦至溪流殘白春前雪柳折新黃夜半風
之句乃閣筆曰不能屬和矣旋爲大臣所忌出守汀州
與岳文肅同日拜命致仕歸而築方洲草堂於海濱家
居三十年歌詩畫筆與雲東逸史齊稱暮年無子有二
婢曰寒香晚翠剪髮自誓不下樓者四十年有司以聞
詔旌爲雙節釋明秀詩云交翦雲鬢報主恩鏡臺花落
洗頭盆同心誓死方洲上霜月寥寥月照門一時和者
甚衆黃門嘗過杭州潑墨寫目送飛鴻手揮五絃圖縱
橫潦草侍婢笑之題詩曰閒尋敗筆作圖畫小鬟立侍

笑欲倒山頭，類似土灰堆。樹根亂若蓬蒿草，所云小鬢殆卽寒香晚翠乎。

攜李詩繫 張汀州先生寧海鹽人七歲題畫龍有莫點金睛恐飛去之句天順中奉使朝鮮餽遺一無所受朝鮮爲樹亭曰却金陪臣樸元亨從遊太平館寧賦百韻詩樸隨手和之殊不相下寧得溪流殘酌春前雪柳折新黃夜半風樸乃閣筆曰不能和矣著有方洲集是時風雅寢微寧力爲振起厥後董許朱陳輩出武原詩學所以獨盛於他邑也。

無聲詩史

張寧字靜之嘉興人舉進士累官禮科給

諫天順間出使高麗畫蘭竹贈陪臣李扶兼題詩其上
云新竹初解籜幽蘭未着花風光雖淺薄生意亦無涯
高麗皇華集載公詩文頗多此其一也復忤執政出爲
汀州守引疾歸詩思敏捷工人物山水

王淮

淮字栢原慈溪人大媿稟

慈谿縣志 王淮爲景泰十子之一好作長歌下筆輒
數十韻造語奇麗擅名江湖間著有大媿稟

潘琴

琴字舜縉景寧人天順丁丑進士有竹軒集詠

史和唐詩

括蒼彙記 琴授南吏部主事歷遷興化知府乞休作
招鶴詞寓意傳聞京師朝士爭和之彙爲鶴溪清風卷
以寄思家居手不釋卷足不至縣廷文學齒德隱然爲
東南望

邱輔仁

輔仁字友文歸安人

靜志居詩話 友文少有至行不樂華靡母衣之以綵
帛赧顏不服長博通經史恥爲章句之學潘元明據湖
州使人名亡去洪武初始歸里業農終其身詩集失傳

惟南湖一首云南湖二月水如天羅綺東風醉少年十里好山多看盡琵琶催撥夕陽船

盧楷

楷字中夫東陽人天順六年鄉舉第一入太學與商輅范理姚夔楊守陳楊守陲爲六元會有可齋集

樵書 天順壬午科浙江東陽盧楷初爲仇家所忌陷入囹圄至八月六日晚甫得脫繫計試事已無及矣是夜大雨如注水漲溢堤次早撥船又明日卽抵武林遂得應試因書一絕於朝天門上云昨從和步撥船開午

過蘭江晚釣臺今日浙江樓上望半千里路似飛來及
放榜乃冠多士斯真所謂風送滕王閣者矣

金華詩錄 盧氏家傳天順壬午爲讎陷繫郡獄郡守
聞書聲遣吏問中夫答以詩有傷心偶讀明夷傳驚起
恩星到福堂語遂釋之時屆秋試已八月初六矣風利
挂帆一日夜至杭州口占云云是科遂發解時人皆比
之風送滕王閣云

黃伯川

伯川名海以字行餘姚人天順壬午舉人任建

寧教諭

姚江逸詩 倪宗正竹橋十詠序曰藝菴黃公以教授致仕歸鄉徜徉於山水之間列爲十景各賦七言律所謂竹橋十詠也予童時見其偉衣冠皓鬢眉巍然達尊少長聞鄉評以公爲首稱今誦十詠則又知其大雅君子也十咏雖蕭散閒遠超於塵外而其感話農談忠謀謹規水旱之憂稼穡之樂泉石之趣時物之感皆本於性情而安於義理篤實光明溫厚典則之氣藹然可掬所謂大雅君子豈不信然乎哉

浙江通志 伯川工詩倪宗正稱其農談里語皆有詩情有竹橋十詠行世

沈 聚

聚字元節平湖人天順甲申進士授工部主事
出知潮州歷知延平臨江終貴州參政有願貞
集

檣李詩繫 沈聚授工部主事監龍江稅有廉聲歷延
平臨江不改其操莊定山有十年清沈美南京今日臨
江沈更清之贈因相傳曰清沈終貴州參政詩文冲淡
純雅五言古最得柴桑風致

姚 綬

綬字公綬嘉善人天順甲申進士授監察御史

謫知永寧縣有穀庵集

靜志居詩話 吾鄉丹邱先生成化中以侍御謫知永寧縣集中永寧有感簡周縣諭詩云孤臣漂泊萬山中家住鴛鴦湖水東爲縣底須論地僻謫居應不笑文窮五株柳樹無端綠一點榴花作意紅百八灘頭船可買思尊何必待秋風遂以母老辭歸家有振衣亭出乘滄江虹月之舟粉窗翠幙吹竹彈絲望者以爲水仙畫詩書皆逸品戶部郎江陰卞榮贈詩云西崦新爲墅東橋近在坳太常卿同郡呂憲贈詩云兩屐登山輕上下一橋分宅作東西尚書烏程閔珪贈詩云松徑掃雲招野

鶴畫船搖月貫晴虹皆實錄也

姜立綱

立綱字廷憲永嘉人七歲以能書命爲翰林院
秀才天順七年授中書舍人成化二十一年陞
吏部郎中宏治四年陞太僕寺少卿

無聲詩史 姜立綱字廷憲永嘉人太僕卿楷法整嚴
畫學黃子久李君實筆談云余偶得太僕一幅蕭疎聳
秀全以黃鶴山樵爲宗特筆意稍未化耳題句云功名
已見繡爲衫萬里青雲入笑談回首九峯天際碧可能
無夢到江南

按兩浙名賢錄作
瑞安人今從府志

李蕃

蕃字文盛桐鄉人天順八年貢士官平樂府照磨

靜志居詩話 天順中有照磨李蕃善詩鄉里至今傳
桐花開到邑侯門之句

章珍

珍字文重甬上人天順間布衣

甬上耆舊詩叙傳 章文重詩溯漢魏以至盛唐諸大
家能造其妙卒後魏雲松先生哭之曰九原詩癖應如

昨月白花開對墓門

懷悅

悅字用和嘉興人

靜志居詩話 用和居在相湖之南曰柳莊亦曰柳溪
故自號柳溪小隱又號相湖漁隱姚允言詩云風流絕
勝韜川莊又云雨衣自織青蒲葉烟艇長維綠柳根蘇
秉衡詩云簾捲夕陽吟對酒窗臨流水坐看鷗皆題其
草堂句也園亭詩酒之會極一時之盛而允言有送用
和納粟之京作又有冠帶從容新帝澤之句則知當日
以納粟入官蓋富而好事者濮樂間之流也今則相湖

在望藪澤微茫舊迹亦不可復問矣

全浙詩話卷三十終